

FORUM ONG TIMOR LESTE THE TIMOR LESTE NGO FORUM



Rua do Mercado Municipal, Dili Timor-Leste/ Mobile + 670 7799 9304, 7724 2717/ forumong.tl@gmail.com, timordiak@gmail.com/ <https://fongtil.org.tl/>

**REZULTADU KOMPILASAUN ANALIZA MEMBRUS FONGTIL KDADALAK
SULIMUTU INSTITUTE (KSI), LAO HAMUTUK (LH) NO REDE
HASATIL RELASIONA HO ADEZAUN TIMOR-LESTE BA OMK INFORMASAUN
NE'E APREZENTA IHA EVENTU KONSULTASAUN HUSI MEKAE BA OSS KONA-
BA PREPARASAUN TIMOR-LESTE ADERE BA OMK IHA DIA 28 OUTUBRU 2021**

TANSÁ TENKE SADERE BA WTO?

World Trade Organization (WTO) nu'udar Organizasaun Mundial Komérsiu (OMK) ne'ebé estabeselese husi nasaun riku sira iha kontinente Europeia, Amerika no ASEAN.

Funsaun prinsipál organizasaun mundiál Komérsiu maka administra, kriasaun no implementasaun akordu entre país membru sira. Akordu primeiru no boot liu hotu maka akordu Jerál kona-ba Tarefa no Komérsiu (General Agreement on Tariffs and Trade – GATT) ne'ebé asina husi nasaun 23 iha tinan 1947.

Nasaun barak maka sai ona membru ba organizasaun mundiál komérsiu ho razaun katak, bele asesu ba iha merkadu internasional no fasil tebes ba nasaun iha mundu bele asesu ba sira nia esportasaun. Razaun seluk, garantia katak produktu no kompañia sira sei hetan oportunidade hanesan no sei tuir organizasaun mundiál komérsiu nia regra kuandu sira serbisu iha nasaun membru seluk, nune'e mós bele asesu ba mekanizmu rezolusaun disputa ne'ebé justu.

Relasiona ho asuntu ne'e, mosu hanoin balun katak nasaun ki'ik sira hanesan Timor-Leste ne'ebé nia merkadu iha rai laran ladún bo'ot no hakarak hetan asesu ba merkadu internasionál hodi haburas no halo diversifikasaun ekonomia rai laran importante tebes ba Timor-Leste atu sai membru organizasaun mundiál komérsiu ka WTO.

Tuir deklarasaun Ministru Koordinator Asuntu Ekonomia (MKAE), Exelentissimo Joaquim Amaral ne'ebé publika iha media Indonézia nian balun katak, importante ba Timor-Leste atu adere ba organizasaun mundiál komérsiu hodi nune'e bele dudu prosesu dezvoltamentu no diversifikasaun ekonomia rai laran.

“Nasaun membru sira deklarasaun ona apoiu ba esforsu ne'ebé maka parte relevante sira husi Timor-Leste halo. Tanba, estadu Timor-Leste ho kometimentu atu hala'o reformasaun ba estrutura, legislativu no polítikas tuir regulamentu organizasaun mundiál komérsiu.”

Publikasaun iha pájina Ministériu Finansas sita katak, importante ba Timor-Leste sai membru Organizasaun Mundial Komérsiu tanba ita avansadu ona iha liberalizasaun komérsiu, maibé seidauk goza priviléjiu, protesau no benefisiu ne'ebé Organizasaun Mundiál Komérsiu oferese.

Timor-Leste iha ona tarefa uniformál ne'ebé ki'ik tebes (2.5%) ho esepasaun mínimu no laiha kuota. Nune'e, sai membru Organizasaun Mundial Komérsiu sei fó garantia ba Timor-Leste atu goza asesu ba merkadu ne'ebé daudaun ne'e limitadu no sei sa'e as liu tan. Sai membru Organizasaun Mundial Komérsiu sei fó mós importánsia kona ba normas no estandarte importasaun ne'ebé tama rai-laran tenke halo tuir, mekanizmu atu rezolve disputa ne'ebé mosu ho nasaun membru seluk no sei oferese asisténsia téknika atu fó tulun iha aspetu komérsiu ne'ebé Organizasaun Mundial Komérsiu oferese.

Kestaun ne'ebé importante liu maka, sai membru Organizasaun Mundial Komérsiu presiza hatudu sinál klaru no kometimentu atu dezenvolve no implementa polítika komérsiu ne'ebé komprensivu no modernu. Tanba, prosesu sai membru Organizasaun Mundial Komérsiu presiza mós esforsu no asaun Timor-Leste nian ho lalais bazeia ba kometimentu atu kria regulamentu, lei no ambiente estruturadu ba komérsiu tuir estandar internasionál.

Maski Timor-Leste hahú hala'o ona negosiasaun formal atu adere (*bergabung*) ba organizasaun mundiál komérsiu, maibé mosu preokupasaun balun katak Timor-Leste presiza tetu molok deside sai membru ba organizasaun refere, tanba nasaun ne'ebé sai ona membru tenke kumpre akordu no regulamentu ne'ebé iha.

Aleinde ida ne'e, organizasaun refere mai ho nia polítika ida oinsá bele domina ita nia merkadu, setór produtivu nomós super indústrhia husi rai ida ba rai seluk, nune'e bele diversifika tan sira nia rikusoin para hetan lukru ba sira nia an.

WTO mós iha membru ne'ebé mai husi kompañia boot sira maka hanesan, kompañia Trans Internasional no Nasional ne'ebé koñesidu iha mundu kona ba prodús adubu kímiku, fini no pestisida. Sira mós halo direitu ba paternizasaun (*hak paten*), ne'e duni bainhira ita atu uza sira nia sasán ka fini ruma tenke husu lisensa, se la'e sira bele komplain.

Perspetiva husi sosiedade sivíl katak, bainhira governu deside tama duni ba membru organizasaun mundiál komérsiu (OMK) iha tempu agora, Timor – Leste sei hasoru problema bo'ot iha futuru, tanba polítika ida ne'e sei investe problema ba nasaun no jersaun tuir mai. Ne'e duni, sujere ba governu di'ak liu labele preokupa atu tama ba organizasaun mundiál komérsiu, maibé oinsá atu fokus hodi dezenvolve setór importante sira maka hanesan, Agrikultura, Kooperativa, Indústrhia no setór produtivu

hirak seluk, inklui dezenvolve mós setór privadu sira iha rai laran oinsá bele prepara an hodi kompete iha merkadu.

Tuir loloos Governu tenke hanoin hodi dezenvolve area produtivu sira, nune'e bele hadi'a ekonomia iha rai laran, hahú husi suku ida ba suku seluk, husi munisipiu ida ba munisipiu seluk, la'ós hanoin maka tama ba organizasaun mundiál komérsiu ne'ebé ita rasik la hatene hun no abut husi polítika organizasaun nian.

Realidade hatudu iha tinan sanulu resin sia (19) nia laran, Timor-Leste seidauk sai membru ba organizasaun mundiál komérsiu mós, Timor-Leste nia ekonomia ema hahú domina ona, sasán ka produktu importasaun husi rai li'ur hahú dudu ses produsaun lokál iha rai laran, piór liu tan kuaze fatin Estratéjiku hirak iha kapitál Dili to'o munisipiu ema estranjeiru (Xineza) maka uza hodi loke loja no super Merkadu.

Indikasaun hirak ne'e hatudu, Timor-Leste seidauk preparadu atu tama ba membru organizasaun mundiál komérsiu, entermus rekursu humanus no produktu ne'ebé maka ita iha, tanba to'o ohin loron ita seidauk sente rezultadu husi produktu ruma ne'ebé atu lori ba kompete ho rai seluk iha merkadu Internasional. Ne'e duni, se governu ho ambisaun hakarak tama ba membru WTO iha tempu agora, entaun saida maka ita atu lori ba kompete?

Hanoin ida tan husi sosiedade sivil dehan, tansá governu la halo investimentu hodi harii indústria iha rai laran, nune'e bele diversifika produktu sira, liu-liu kafé ne'ebé durante ne'e ita esporta ba rai li'ur labele ona ho kulit ka musan, maibé oinsá ita bele esporta kafé ho modelu hanesan *neskafé (bahan jadi)*, nune'e ita nia kafé bele hetan folin di'ak iha merkadu, tanba se ita esporta nafatin (*bahan mentah*) hanesan agora, konserteza ema sosa ho folin baratu depois sira lori ba *kelolah* tiha mai fa'an fali ho folin boot.

Polítika husi organizasaun mundiál komérsiu ka WTO deskreve mós regulamentu balun, liu-liu agreement kona ba setór agrikultura nian ne'ebé hateten, bainhira nasaun membru ida nia produsaun iha rai laran hakarak hetan inisiativa sira prontu apoiu, maibé produsaun hirak ne'e sira mak sei sosa.

Klaru katak, ninia impaktu direktamente sei akontese privatizasaun makas no setór agrikultura sei dependente ba kompañia hirak ne'ebé nu'udar membru WTO ne'ebé maka durante ne'e prodús fini, pestisida kímiku, adubu kímiku no buat seluk tan hodi fó ameasa ba produsaun agrikultura iha rai laran.

Deklarasaun husi ukun balun dehan, bainhira Timor-Leste tama organizasaun mundiál komérsiu, sei hafasil ita nia dalan ba prosesu esportasaun, maibé sosiedade sivil deskorda ho deklarasaun ida ne'e, tanba esperiénsia husi nasaun balun hatudu ona katak, polítika

ida ne'e fó espasu ba kompañia boot husi nasaun riku sira hanesan trans-nasionál ne'ebé investe ona ba setór agrikultura hodi prodús fini, pestisida kímiku no adubu kímiku.

TL Seidauk Iha Produutu Potensiál

Bainhira Timor-Leste deside sai ona membru WTO konserteza tenke kumpre akordu hirak ne'ebé estabelese iha WTO nia laran, maibé hare ba situasaun agrikultura iha Timor-Leste sei hamosu problema boot iha futuro, tanba Timor-Leste laiha produutu potensiál ne'ebé atu lori kompete ho nasaun seluk.

Nu'udar nasaun ki'ik, Timor-Leste iha poténsia agrikultura ne'e duni tenke hare ninia risku no tenke tetu halo didi'ak molok deside tama ba membru WTO, tanba daudauk ne'e Timor-Leste enfrenta hela menus produsaun, rai produtividade barak maka abandona, fini iha rai laran kuaze atu lakon, rekursu naturais la funsiona ho di'ak.

Situasaun hirak ne'e hotu hatudu mai ita katak, bainhira Timor-Leste ansi tama ba membru WTO ema barak sei mai investe no halo akordu ida ho estadu hodi reforma rai hirak ne'e hotu hodi benefisia sira nia an.

Bainhira sira estabelese akordu ho estadu hodi reforma rai produtividade hirak ne'e, konserteza povu agrikultór sira laiha rai atu halo produsaun. "Ita tauk maka akontese hanesan iha Indonezia, ema foti hotu rai produtivu, depois haruka sira nia ema servisu iha ne'ebá hodi halo produsaun no lori ba faan fali iha merkadu,"

Indonézia sai membru WTO hahú iha laron, 24 Feveireiru 1950. Durante sai membru WTO benefisiu ne'ebé Indonézia hetan maka livre husi mafia komérsiu, *dumping* no diskriminasaun. Maibé, problema ne'ebé sira hasoru maka empreza multinasional husi rai li'ur domina fali setór komérsiu ne'ebé estratéjia no ida ne'e sai ameasa ba ezisténcia setór privadu sira iha rai laran.

Relasiona ho kestaun ne'e, governu indonézia hamosu mós polítika ida atu salva produutu husi rai laran, maibé iha prosesu mediasaun indonézia labele kompete tanba antes ne'e asina ona akordu.

La'ó Hamutuk iha ninia pontu de vista hateten, Timor-Leste iha situasaun ida ne'ebé frazil tebes intermus dezenvolvimentu, tanba realidade hatudu setór produtivu barak maka seidauk dezenvolve ho di'ak no seidauk sai prioridade governu nian, liu-liu setór agrikultura, Turizmu, Kooperativa, inklui setór produtivu hirak ne'ebé bele ajuda povu nia moris.

Problema seluk fali sistema báziku ka setór sosiál hanesan edukasaun no saúde foin maka hahú dezenvolve no to'ó agora eskola públiku barak enfrenta hela problema infrastrutura, inklui eskola públiku iha kapitál Dili, tanba laiha kondisaun ba estudante

sira atu aprende, livru ba labarik sira mínimu tebes, piór liu tan eskola balun to'ó ohin lora laiha biblioteka.

Aleinde ne'e, Timor-Leste agora daudauk iha situasaun pandemia nia laran, hahú keda husi tinan 2017 to'ó agora, ita nia situasaun polítika mos la normal. Hare husi situasaun hirak ne'e hotu hatudu katak, intermu preparasaun Timor-Leste seidauk iha kondisaun ne'ebé natoon atu adere ba organizasaun mundiál komérsiu ka WTO.

Ho realidade hirak ne'e La'ó Hamutuk sujere ba Governu, liu husi Ministériu Koordinator Asuntu Ekonomia (MKAE) no organizasaun hirak ne'ebé servisu hamutuk atu fokus ka fó prioridade hodi hadi'a sistema internal iha rai laran, hadi'a dezvoltamentu, hadi'a problema báziku ne'ebé akontese no rezolve problema sosiál hirak seluk. Bainhira kondisaun hirak ne'e responde hotu ona, hafoin maka Timor-Leste bele halo adesaun ba membru WTO tanba ita preparadu ona.

Bainhira Timor-Leste sai ona membru ba WTO, kritériu ida maka tenke ajusta ita nia lei no polítika tuir WTO nian, labele kontradís fali ho sira nia polítika no lei. Ezemplu, iha lei *procurement* nian, se governu Timor-Leste loke tender ruma, kompañia husi nasaun seluk hanesan, Amerika, Inglaterra no indonézia bele mai tuir tenderizasaun, ita labele taka dalan ba sira mais tenke loke oportunidade no vantajen ne'ebé hanesan ba kompañia sira husi rai li'ur.

Bainhira ita taka dalan ba sira, dala ruma sira bele uza fali lei hirak ne'e hodi *mengugat* ita iha Tribunál ne'ebé hare kona ba prosesu hirak ne'e.

La'ó Hamutuk konsidera deklarasaun husi ukun na'in balun ne'ebé dehan, se karik Timor-Leste tama ba WTO sei garante asesu ba merkadu justu, ida ne'e hanesan propaganda de'it hodi bosok públiku, tanba kona ba lei merkadu livre nian (free trade agreement) ita tenke ajusta ho polítika no lei WTO nian.

Bainhira ita loke merkadu ba investor sira husi rai li'ur (indonézia) atu mai investe, konserteza ita mós tenke loke oportunidade hanesan ba membru WTO husi nasaun seluk hodi tama mai halo investimentu. Aleinde ne'e, kompañia iha Timor-Leste mós tenke servisu makas hodi kompete ho kompañia husi rai li'ur, se la'e ita nafatin sai *penontong* depois kompañia husi nasaun seluk maka domina ita nia merkadu no ekonomia.

Iha akordu balun sita katak, nasaun hotu ne'ebé hakarak sai membru WTO tenke hakruk ba lei ne'ebé WTO rasik prodús ona no nasaun ne'e tenke asina akordu refere, ne'e duni hanesan sosiedade sivíl ami sei duvida, tanba ita seidauk preparadu no presiza servisu makas liu tan, tanba setór privadu iha rai laran hare husi entermus kapitál sei depende ba projetu governu liu husi Orsamentu Jerál Estadu (OJE), tanba sira seidauk

iha kapitál rasik atu halo konstrusaun ba projetu boot ruma depois hein governu halo pagamentu.

Situasaun hirak ne'e hotu hatudu katak ita nia setór privadu rasik seidauk preparadu atu bele kompete ho setór privadu sira husi nasaun seluk, entaun ida ne'e hanesan problema ida no la loos kuandu ita dehan polítika WTO ne'e atu garante merkadu justu.

Bainhira ko'alia kona ba merkadu justu konserteza ita bele faan ita nia produktu ba sira no sira mós bele faan sira nia produktu mai ita, parte rua hetan hotu lukru, ida ne'e maka ita bele ko'alia merkadu ne'ebé justu, maibé se ida ne'ebé maka ho modal boot, matenek, iha skill no teknolojia ne'ebé avansadu kompara ho ita nia setór privadu sira ne'ebé *papan nama* de'it seidauk metin, ida ne'e ita atu dehan justu hanusá.

Asuntu ida ne'e (WTO) presiza iha diskusaun nivel sosiedade sivíl, akademista, inklui governu. Maibé, nasionalmente ita laiha debates ne'ebé profunda, tanba ohin loron movimentu anti globalizasaun transforma ona ba kestaun hirak hanesan luta iha kontestu ambientál.

WTO nu'udar orgaun prinsipal ida ba liberalizasaun ekonomia iha mundu, maibé liberalizasaun ne'e ita ko'alia kona ba promosaun valores kapitalizmu nian, hanesan ita hatene kona ba 'Uruguay Round' ne'ebé fó apoiu ba North American Free Trade Agreement (NAFTA) ne'ebé involve nasaun Canada, Estados Unidos Amerika no Mexico hodi hala'o koordenasaun ba atividade ekonomia, inklui relasaun komunikasaun, atividade kultura no sidadania, atividade sosial no saúde.

Movimentu anti globalizasaun ne'e sei iha, maibé expekulasaun ba WTO ne'e ladún mosu iha ativista sira nia luta ba tinan hirak ikus ne'e.

Tansá maka nasaun sira hakarak sai membru ba organizasaun ida ne'e.? FONGTIL hanoin nasaun ida-idak bele espekula Ninia razaun, maibé jerálmente sira nia prinsipiu hanesan de'it kuandu tama iha WTO, signifika nasaun ne'e liberaliza ninia ekonomia no ida ne'e hanesan kritéria ida, tantu esplísita no implísita sira husu kuandu nasaun ne'ebé aseita atu sai membru ba WTO.

Pontu seluk ne'ebé ita presiza hare maka WTO ne'e parseria ho organizasaun ne'ebé ema bolu ho naran International Financial Institution (IFI) ne'ebé refere ba instituisaun *twins' genes* instituisaun kaduak hanesan Banku Mundial ka Fundu Monetariu Internasional (FMI). instituisaun ne'e oinsá maka operasionaliza no oferese ideas ba movimentu kapitalizmu nu'udar sistema ekonomia ida ne'ebé ho krize esperiéncia maibé nia nafatin influénsia nasaun barak.

“Timor-Leste ninia ekonomia agora daudauk liberaliza tiha ona, ne’e duni labele hakfodak kuandu Timor-Leste atu sai membru WTO. Tanba, iha ita nia konstituisaun artigu 38 ko’alia kedas kona ba ajente ekonomia 3 maka hanesan, setór privadu, estatal no ajénsia ekonomia kooperativa ne’ebé nia formatu ba ekonomia komunitária,” deklara Antero Benedito ba media balun.

Iha tinan hirak ikus ne’e, governu sempre pronunsia kona-ba kreximentu ekonómiku, maibé se kreximentu ekonómiku ne’e governu prodús beibeik ona ba setór privadu, konserteza Timor-Leste inkлина ona iha ekonomia liberal ne’ebé agora daudauk operasionaliza hela iha Timor, ne’e duni laiha kontradisaun ruma bainhira Timor-Leste atu sai membru WTO.

Kestaun agora maka prioridade ba Timor-Leste ka la’e? hanoin ba momentu ida ne’e, ita laiha kapasidade atu kompete no intelektualmente ita laiha ema ne’ebé peritu hodi halo debates no estudu nasional kona ba asuntu refere. Timor-Leste sempre iha tendénsia ba kestaun hirak ne’e, maibé ita hakarak ratifika lei barak no piór liu tan ita hetan presau uitoan husi organizasaun internasional no ajénsia sira mai influénsia, ita rame-rame halo ratifikasaun, maske buat hirak ne’e iha implikasaun ba utilizasaun rekursu umanu no ita nia finansiamentu nasional.

Klaru katak Timor-Leste seidauk iha kondisaun ba asuntu ida ne’e, depois poténsia ida ne’ebé governu sempre artikula katak ita iha kafé Timor, ne’e duni presiza luta hodi tama ba WTO, maibé buat hirak ne’e hotu hanesan artikulasau no ida ne’e iha prinsipiu WTO nian ema bolu *hak paten* ka *intellectual property right* hanesan regime legal ida iha WTO ne’ebé bele fó dalan ba nasaun membru sira, se kuandu nain ba buat ruma ida ne’e bele sai sira nian, ne’e duni ema seluk karik uza, ezemplu kafé Timor kuandu ema seluk kuda kafé iha fatin seluk tenke husu lisensa ba Timor-Leste tanba Timor maka nain, ida ne’e maka durante ne’e governu hanoin.

Seluk maka agora dadauk UNESCO hala’o hela buat ne’ebé bolu naran patrimóniu umanidade ba Tais, ida ne’e governu artikula ka la’e.? Tais ne’e Timor maka na’in, ida ne’e iha lei WTO iha ka la’e, tanbá dehan se nasaun sira seluk maka hakarak prodús tais tenke husu lisensa ba Timor, tanba ida ne’e propriedade no direitu intelektual povu Timor nian.

Kestaun hirak ne’e maka sai arenas debate entre ema sira ne’ebé anti kapitalizmu ho ema sira ne’ebé pro-kapitalizmu. Tanba parte ba konseitu kapitalizmu nian iha tendénsia ba paternizasaun no hakarak sai nain ba propriedade inkluindu buat hirak ne’e.

“FONGTIL hanoin iha buat barak kona ba *property intellectual right* ne’ebé ema uza hodi paterniza buat ne’ebé direitu popular nasaun sira nian. Iha prinsipiu WTO legalmente

uza sistema ida ne'e hodi hadau rikusoin nasaun sira nian, tanba ne'e maka ema sira ne'ebé eskerda sempre hare katak presiza iha movimentu hodi kontra instituisaun ida ne'e nia ezisténsia.

Problema seluk ita laiha kontrola ba peskiza hirak ne'ebé la'o ona iha Timor-Leste, ita la hatene karik ema balun sei kontinua halo peskiza kona ba ita nia rai ka la'e, ida de'it mós ita la kontrola no se de'it maka tama iha Timor ba fatin ne'ebé de'it conforme sira nia hakarak, entaun koñesimentu Timor nian ema na'ok barak ona.

Relasiona ho situausaun hirak ne'e, hanoin katak argumentu ne'ebé governu hato'o ladún válidu no seidak iha emerjénsia ba asuntu ida ne'e, tanba prioridade liu maka ita presiza auto-sufisiénsia alimentar nasional, maibé to'o agora governu la konsege responde situausaun ida ne'e, depois ita hakarak atu exporta saida.

Ezemplu, exporta mina, hanesan USAID apoiu maluk balun iha Baucau ne'ebé prodús mina bimoli uza kami, maibé mina ne'e atu ita han de'it la to'o no dala barak ita sosa fali mina bimoli importadu. Seluk fali maka fós, ita nia produsaun daudauk ne'e la to'o hodi responde nesesidade nasional no tanbasá maka folin fós lokál sa'e? inklui batar ne'ebé prodús laiha sirkulasaun horizontal husi comunidade ida ba comunidade seluk, situausaun ne'e to'o agora laiha governu ida maka konsege atu hare.

Importante NGO hotu-hotu tenke promove debates, tanba durante ne'e laiha debate no asaun ruma husi movimentu sosiál kona ba ezisténsia banku mundiál iha Timor-Leste, ezisténsia fundu umanitaria internacional ninia intervensaun iha nasaun hirak ne'ebé terseiru mundu ka nasaun hirak ne'ebé iha esperiénsia krize hanesan iha Portugal ne'ebé iha tinan hirak liu ba to'o agora sei iha problema finanseiru entaun sira tenke empresta osan ba banku mundiál.

Aproveita situausaun Covid-19 ne'e hodi fó prioridade ba auto-sufisiénsia alimentar nasional, liu husi mobiliza populasaun para halo servisu, aprende husi situausaun ne'e hodi aumenta ita nia rezilensia iha kapasidade produsaun alimentar.

TL Tenke Kuidadu ho Politika WTO

KDADALAK: Iha loron 25 Novembru 2020, Governu liu husi Konsellu Ministru (KM) aprova ona deliberausaun mandatu ba negosiasaun adezaun Timor-Leste (TL) ba Organizausaun Mundiál Komérsiu (OMK) ka World Trade Organization (WTO). Proposta ne'e apresenta husi Ministru Koordenadór Asuntu Ekonómiku (MKAE), Joaquim Amaral.

Ho deliberausaun ida ne'e autoriza ona mandatu ba MKAE atu hala'o negosiasaun adezaun Timor Leste nian ba Organizausaun Mundial Komérsiu. Ministru ne'ebé xefia sei hetan apoiu husi delegasaun membru representante sira husi kada departamentu

governu nian ne'ebé kompostu husi Prezidénsia Konsellu Ministru (PKM), Ministériu Finansa (MF), Ministériu Negósiu Estranjeiru no Kooperasaun (MNEK), Ministériu Saúde (MS), Ministériu Turizmu Komérsiu Indústria (MTKI), Ministériu Agrikultura Peska (MAP) nomós Ministériu Petróleu no Minerais.

Maske nune'e, desizaun governu atu adere ba WTO dezde iha primeiru governu nia ukun hetan kritika makas husi sosiedade sivíl, ate balun rekomenda katak, tuir loloos governu hanoin oinsá atu dezenvolve setór produtivu sira, nune'e bele hadi'a ekonomia povu iha rai laran, duke hanoin tama ba membru WTO mais ita rasik laiha produktu atu lori ba kompete iha merkadu internasional.

Antes ne'e, iha tinan hirak liu ba kordenador HASATIL, Gil Boavida rekomenda ba governu di'ak liu deside labele tama ba membru organizaun mundiál komérsiu ka WTO, maibé oinsá atu buka dezenvolve setór agrikultura, indústria no setór produtivu hirak seluk, inklui setór privadu sira iha rai laran.

Pontus lubuk ida maka deskreve iha akordu nia laran, liu-liu liga ba subsídiu ne'ebé iha sei la fo vantagen ba produsaun iha rai laran, tanba ho persentajen ne'ebé maka la hanesan, Ezemplu, iha rai laran ne'e subsídiu 30% maibé iha rai li'ur redús ba 24% entaun ita labele asesu livre ba produktu ne'ebé ita iha.

Problema seluk ita laiha produktu potenciál ne'ebé bele asesu ba merkadu no dala ruma ita avansa ho produktu ne'ebé orgániku tanba iha akordu dehan di'ak mais iha implementasaun dala ruma falla tanba la tuir buat ne'ebé maka ita aseita hamutuk.

Dadalia entre KSI ho representante organizaun Serikat Petani Indonezia (SPI), Zainal Arifin Fuad tinan hirak liu ba hatete, polítika merkadu livre ne'ebé hetan apoiu husi organizaun mundiál komérsiu hanesan WTO nu'udar inimigu ida ba agrikultór sira, ne'e duni agrikultór tenke konsiente no kuidadu ho polítika hirak ne'e tamba bele fó ameasa ba produsaun iha rai laran.

Iha indonézia governu halo hela lei ida hodi hamenus importasaun husi rai li'ur, liu-liu na'an tamba tanba agrikultór sira konsege prodús ona ai han, modo no na'an. Maski nune'e, WTO lakohi no ezije nafatin ba Governu indonézia tenke loke sira nian merkadu, hodi nune'e sasán husi nasaun seluk bele tama tamba indonézia asina ona akordu hodi sai membru WTO.

Dala ruma ita iha na'an barak modo no ai han lokál seluk ho kualidade di'ak, maibé la folin iha merkadu tamba impaktu husi sistema merkadu livre ne'ebé fó espasu ba nasaun seluk hodi hatama nafatin sira nia sasán.

Atu antisipa situasaun hirak ne'e labele akontese, ukun nain sira tenke rona ideas husi parte seluk no buka hatene mós esperiéncia ne'ebé akontese ona husi nasaun seluk.

Aleinde ne'e, ita mós presiza hatene lala'ok polítika merkadu livre, tanba polítika ida ne'e la'ós de'it WTO maka promove, maibé bele mós husi Asia Pasífiku, China, Amerika no Australia ne'ebé bele fó ameasa ba agrikultór sira nia moris.

Tuir La'ó Hamutuk deklarara, bainhira Timor-Leste sai ona membru WTO, signifika konkorda ho regulamentu tomak ne'ebé maka iha. Ne'e duni, kuandu hakarak fó subsidiu ba toos nain sira tenke liu husi konkordánsia ida no dala ruma sira bele decide to'o de'it tinan ida ka rua, labele to'o tinan naruk ho razaun katak bele hamate fali produtór ka agrikultór husi nasaun seluk.

Ida ne'e maka sai problema no la fasil. Tanba, se karik governu la halo tuir sira nia hanoin, dala ruma subsidiu ba agrikultór sira bele hapara, entaun nasaun seluk bele lori ita nia governu ba iha Tribunál ne'ebé WTO rasik iha hodi akuza katak, "tanbasá ita iha ona konkordánsia hodi fó subsidiu ba to'os na'in sira, maibé ita bo'ot sira fa'an fali produktu ba nasaun seluk ho folin baratu."

Situasaun hanesan ne'e akontese ona ba nasaun balun iha America Latina, Canada no Brazil. Iha nasaun bo'ot balun sira nia setór agrikultura dezenvolve ho di'ak, maibé maioria produktu hirak ne'e nain ba kompañia, entaun toos nain sira sai atan tanba sira kuda fó ba kompañia depois kompañia selu sira.

Ezemplu iha indonézia, toos nain sira kuda plantasaun barak, maibé ida ne'e nain ba kompañia internasional sira ne'ebé tama ona iha ne'ebá depois maka join ho kompañia lokál sira no ikus mai agrikultór no povu sira maka sai vítima, tanba povu la hatene situasaun hirak ne'e, piór liu governu tau tasa ho folin bo'ot, depois selu tasa labele sira faan tiha rai.

Timor-Leste seidauk sai membru ba WTO mós ita exporta ona kafé ba nasaun seluk, ida ne'e realidade no governu mós labele bosok. Ita nia instituisaun ne'e frazil tebes, tanba lider polítiku sira hanoin de'it maka buat ne'ebé aas, la hare ba realidade, sira hanoin de'it maka kaer ona ukun entaun bele halo buat oin-oin hodi fó sofre ba povu.

FONGTIL la konkorda argumentu husi governu ne'ebé dehan, fasil ba Timor-Leste atu halo esportasaun bainhira tama ba membru WTO, tanba iha buat balun ne'ebé ita presiza kuidadu, ne'e duni argumentu governu nian ne'e ladún válidu. Sai membru WTO ninia di'ak maka bele vizita turista ho visa livre ba buat hotu.

Tuir loloos hanesan Timor-Leste bele sai hanesan observadór iha konferénsia hirak ne'ebé maka organizasaun mundiál komérsiu ka WTO organiza no ita ba la'ós atu fó idea ka opsaun mais ba hare de'it hodi gaña esperiénsia husi nasaun seluk, nune'e mai dezenvolve fali ita nia rai no ita nia setór produtivu sira, depois ita hare forte ona hafoin bele halo adesaun.

Iha Orsamentu Jerál Estadu 2020 nian, governu ko'alia hodi tau osan millaun \$ 2 ba tuir expo Dubai. Ida ne'e parte husi programa balun atu promove ita nia prezensa hodi hatudu ba mundu katak ita mós bele tuir expo hirak ne'e, maibé hare ba realidade iha rai laran seidauk iha preparasaun di'ak.

“Se ita ba tuir expo iha Dubai, depois lori ita nia produktu hanesan kafé no mina nu'u hodi ba hatudu no bainhira kompañia internasional sira husu kada fulan rua ka tolu tenke haruka tonelada 20 ka 30, ida ne'e ita iha kondisaun ka la'e.”

Timor-Leste lalika hanoin atu sai membru WTO lai, ita presiza prepara kondisaun iha rai laran, hadi'a ita nia ekonomia, polítika no dezenvolve setór produtivu, inklui setór báziku sira no bainhira ita forte ona iha dezenvolvimentu hirak ne'e, entaun ita bele kompete ona ho kampaña ka nasaun seluk ne'ebé hakarak mai investe.

KSI Kontra Polítika WTO

Nu'udar organizasaun movimentu ne'ebé servisu besik liu ho komidade sira iha area rural, Kdadalak Sulimutuk Institute (KSI) observa katak dezenvolvimentu setór produtivu sira, liu-liu iha setór agrikultura, kooperativa no indústriia sei frazil tebes, tan ne'e Timor-Leste presiza tetu halo didi'ak bainhira deside sai membru ba Organizasaun Mundial Komérsiu (OMK) ka *World Trade Organization* (WTO), nune'e iha futuru labele hamosu problema ba povu no nasaun ne'e.

Estadu Timor-Leste tuir loloos buka alternativa seluk hodi dezenvolve rasik ninia ekonomia tuir situasaun no kontestu Timor nian, duke hanoin maka tama ba WTO ne'ebé laiha benefísiu no ita rasik la hatene hun no abut husi polítika organizasaun ida ne'e. Tanba ne'e, dezde uluk kedas KSI kontra polítika WTO no la aseita Timor-Leste adere ba organizasaun refere.

Realidade hatudu polítika husi nasaun kapitalista sira la justu, buat hirak ne'ebé sira forma dala barak benefisia de'it ba sira nia an, ezemplu ida maka nasaun riku sira organiza malu hodi harii organizasaun mundiál komérsiu ka WTO, tanba sira sente katak sira matenek, iha osan no buat hotu hodi nune'e hakarak domina rai seluk ne'ebé hanoin atu sai membru ba sira.

Objetivu WTO ne'e atu kontrola no estabese akordu hodi hamosu regulamentu komérsiu ba nasun hirak ne'ebé sai nu'udar membru. Aleinde ne'e, sira mós mai ho polítika ida oinsá atu diversifika tan sira nia riku soin hodi bele hetan lukru ba sira nia an no sira la preokupa ho nasaun ki'ik sira seluk, tanba sira mai ho polítika ida oinsá bele domina ita nia merkadu, setór potenciál sira no super indústriia husi rai ida ba rai seluk.

Kuandu Timor-Leste sai ona membru WTO konserteza ita sei kompete ho nasaun membru hirak seluk iha setór hotu-hotu, ezemplu Timor-Leste presiza harii infrastrutura boot hodi ema mai halo investmentu, maibé ita laiha osan entaun ita ba

deve hodi harii investimentu hirak hanesan estrada, ponte, uma, aeroportu no buat seluk, depois ita hetan osan husi investimentu hirak ne'e maka ita selu fali ema nian osan, maibe ida ne'e ita bele ka la'e.?

Orsamentu Jerál Estadu de'it mós ezekuta la hotu, sasán deve hela de'it no dezvoltimentu iha rai laran hakdasak, ne'e duni presiza kuidadu. Tuir loloos governu fokus no hanoin oinsá atu dezvoltive ita nia setór potenciál sira, nune'e hadi'a uluk ekonomia iha rai laran.

Direktor KSI haktuir, karik Timor-Leste sai duni membru WTO, ita prepara atu hasoru risku ka ninia impaktu iha futuru, tanba kompetisaun ekonomia ita la bele no ita sei la hetan buat ruma husi ne'e, entaun ema husi nasaun seluk hanesan, Xina, Pakistaun, Bangladés no indonézia maka mai hodi domina ekonomia rai laran hodi fó servisu ba Timor oan fulan ida simu de'it saláriu \$ dollar 100 ka 150, piór liu tan laiha kontratu servisu.

Husi indikasaun hirak ne'e nota katak, Timor-Leste seidauk preparadu atu tama ba membru WTO, intermus rekursu humanus no produktu ne'ebé maka ita iha, tanba faktus hatudu iha implementasaun programa sesta bázika produktu iha rai laran la suficiente (la to'o) atu distribui ba komunidadade sira, ne'e duni tenke sosa mós ai-han importasaun ne'ebé mai husi rai li'ur, ezemplu ida maka fós.

Klaru katak ninia impaktu direktamente sei akontese privatizasaun no setór agrikultura sei dependente ba kompañia ne'ebé prodús fini, pestisida kímiku, adubu kímiku no buat seluk tan ne'ebé bele fó ameasa ba produsaun agrikultura iha rai laran.